

Date – 18/07/2025

Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. School Education Minister Dr. Vanlalthlanan MBSE Building thar nimin khan a hawng a, Pawl 12 zirlaibu mizo tawnga buatsaih chu a tlangzarh nghal bawk.**
- 2. Lunglei khawpui chuan ram pum huap khawpui fai lawmman, Swachh Survekshan State Award a dawng.**
- 3. Union Ministry of External Affairs chuan Yemen-a Nimisha Priya-i thubuai chu fimkhur ngai tak anih thu leh sawrkarin theihtawpin a puih thu a sawi.**
- 4. Prime Minister Narendra Modia chuan vawiin hian Bihar leh West Bengal a tlawh dawn.**

<><><>

EDUCATION MINISTER

School Education Minister Dr. Vanlalthlanan Mizoram Board of School Education Building thar nimin khan a hawng a, Pawl 12 zirlaibu Physics, Chemistry, Biology leh Mathematics, mizo tawnga buatsaih chu a tlangzarh nghal bawk.

Education Minister Dr. Vanlalthlana New Education Policy 2020-in a beisei anga zirlaibu engemaw zah mizo tawng a buatsaih a nih tawh bakah Pawl 12 Science leh Mathematics zirlaibu hman tur, mizo tawnga buatsaih chuan Mizoram chhunga zirna hmasawna a hmuh phah ngei a beisei thu a sawi.

Education Minister chuan NCERT hnuaia zirna dinhmun endikna pakhat, Performance Assessment, Review and Analysis of Knowledge for Holistic Development (PARAKH) hmanga Mizoram school engemaw zah endiknaah dinhmun duhawm loh taka ding anga an lan mek lain, zirna in sang zawk, College leh University-te erawh National Assessment and Accreditation Council (NAAC) endikna ah hmahruaitu zingah an tel zel thung, tih a sawi a. He inthlauhna hi zirchianga, ruahmanna siam a nih theihna turin NITI Aayog-ah thlen a nih thu a sawi bawk a ni.

He hunah hian School Education Department Special Secy Pu David Lalthantluanga chuan Mizoram chhunga School-te chu National Education Policy 2020 in a phut angin State School Standard Assessment (SSSA) hmanga

endikna kalpui thin a nih tur thu a sawi a. Ram pum huap, zirna a inelna hrang hrang, National Eligibility cum Entrance Test leh Joint Entrance Examination- a mizo zirlaite dinhmun en hian zirna kalpui dan hi thlirlet a, tan lak ngaihna lai zirchian a, hmasawn tura inbuatsaih zel a pawimawh thu a sawi.



LUNGPHUN ROPUI

Sorkar laipui Ministry of Culture (Archaeological Survey of India) chuan Champhai district-a Lianpui khuaa Lungphun ropui chu hmun pawimawh bik National Importance ah a puang.

VC

Archaeological Survey of India chuan Lianpui khua a pi pu sulhnu "Lungphun Ropui" chu India rama hmun pawimawh atan a puang a. Gazette of India ah tarlan a ni. Lianpui khua a Pi Pu Sulhnu India rama hmun pawimawh a puan a nih theihna tur hian tun thla ni 6 khan Archaeological Survey of India Director Subramanyam an a hmunah a tlawh a ni.

Lianpui khua a Lungphun Ropui hi Archaeological Survey of India chuan kum 2021 khan National importance a puan a nih theihna turin Preliminary notification a lo ti chhuak tawh bawh a ni.

Lungphun Ropui India rama hmun pawimawha puan a ni ta hi Lianpui khawtlang chuan lawmawm an tih thu an sawi a, theih tawp chhuaha hmalak puitu tu Art & Culture Minister Pu C.Lalsawivunga leh Rajya Sabha MP Pu K.Vanlalvena te chungah lawmthu an sawi a ni.



SWACHH SURVEKSHAN AWARD

Lunglei khawpui chuan ram pum huap khawpui fai lawmman, Swachh Survekshan State Award a dawng.

Ministry of Housing and Urban Affairs (MoHUA) buatsaih India ram puma khawpui fai inelna, Swachh Survekshan Award 2024-2025 chu vnimin khan New Delhi-a Vigyan Bhawan-ah sem niin, Lunglei chuan State Award pakhat, Mizoram khawpui zinga faina kawnga hma hun eng ber lawmman, 'Promising Swachh Shehar Award' a dawng a. Lawmman hi Mizoram sawrkara Urban Development & Poverty Alleviation (UD&PA) Minister Pu K. Sapdanga hovin, Lunglei Municipal Council (LMC)-a Vice Chairman Pu K. Lalrinawma leh official te'n Union Minister of Housing & Urban Affairs Pu Manohar Lal kut atangin an dawng a ni.

Lunglei Municipal Council (LMC)-a Vice Chairman Pu K.

Lalrinawma report lo ngaithla ang.

Swachh Survekshan Award hi Swachh Bharat Mission-Urban (SBM-U) hnuaia inelna niin, he inelnaah hian India rama khawpui zawng zawngte chu tehfung hrang hrang hmangin an inel a. Tun tum hi Swachh Survekshan Award vawi 9-na niin, khawpui len dan azirin inelna huang hrang hrang siam a ni a. Tun tumah hian award chi hrang 78 sem chhuah a ni a.

Kum 2016-a Swachh Survekshan Award bul tan a nih atangin Lunglei khawpui chuan award 6 a dawng tawh a ni.

<><><>

CONGRESS PRESS CONFERENCE

Mizoram Pradesh Congress Committee thupuangtu Dr Lallianchhunga’n ZPM sorkar chu restricted tender uar taka kalpuiah a puh.

Nimina MPCC Media department ten a hoa Aizawl Press Club-a chanchinbumite a kawmnaah MPCC Spokesperson Dr Lallianchhunga chuan ZPM Leader Pu Lalduhoma chuan MNF sorkar laia restricted tender inpek dan a sawisel thin a ti a, MNF sorkar hnuaia sum leh pai harsatna nen sawi zawmin Restricted Tender ringawt pawh an tih ve loh chuan Mizoram sum dinhmun nasa takin a siam tha nghal ringawt dawn tiin a sawi thin a. Hetiang khawpa an sawisel hi tuna an sorkar hnuah ZPM chuan uar leh nasa zawkin an kalpui ta a ni a ti.

Dr. Lallianchhunga chuan Sorkar document-a an hmuh theih atanga a lan danin ZPM sorkar chuan kumin April 17 khan SASCI 2024-25 hnuaia hna cheng vbch 629 leh nuai 17 man chu Restricted Tender hmangin an duhsak zawng te an thawh tir theihna turin Department te chu blanket approval a pe tih a sawi a. Hei hi Eptu party an nih laia an thusawi nen a inkalh chiang hle tih sawiin RTI chhanna atanga a lan danin ZPM sorkar pian atanga kumin April Ni 29 thleng khan Restricted Tender hmangin hna lian tak tak 47, cheng vbch 316 leh nuai 38 chuang man a pe chhuak tawh a ti.

Kum 2023 Assembly Inthlanpuia ZPM Manifesto ah "Contract hnate a tam thei ang ber Open Tender-a koh thin a ni ang" tih a awm thu sawiin Dr Lallianchhunga chuan an Party Manifesto ngei pawh palzuta sorkarin Restricted Tender a kalpui dan chuan sorkar belhchiandawl leh rintlak tak a nih loh zia a tilang chiang hle a ni a ti bawk.

<><><>

SAITUAL

Saituala District Education Officer chu thlaktu awmlova sawn tum a ni tih sawiin, an duhloh zia lantir nan Saitual MZP Hqrs Sleh All NGO Saitual hmalaknain DEO leh a staff te Pisa kai tur nimin atang khan an dang.

DEO pisa kai tur dannaah kalkhawmte hian resolution siamin, District Education Officer sawnchhuah sak chungchangah MZP Headquarters Saitual ten hma lain, Education Minister leh bialtu MLA te hnena DEO sawnchhuak lo tura an ngenna chuan awmzia a nei lova hei vang hian DEO leh a hnathawk zawng zawngte chu Saitual District VC Association leh All NGO te chuan tiam chin awm lova an Pisa kai tur dan nise an ti tih an sawi a ni.

Saitual DEO chu a thlaktu tur awm lova sawnchhuah an remti lova, a thlaktu tur DEO ngei sorkarin a pek hma loh chuan sawnchhuah sak lo tur leh Transfer order chusut sak turin sorkar an ngen tih an resolutionah chuan an tarlang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MEA

Union Ministry of External Affairs chuan Yemen-a Nimisha Priya-i thubuai chu fimkhur ngai tak anih thu leh sawrkarin theihtawpin a puih thu a sawi. New Delhiah chanchinbumite kawmin MEA thupuangtu Randhir Jaiswal chuan Yemen thuneituten Nimisha Priya tihhlum hun tura an ruat tun thla ni 16 chu an ti khawtlai leh tih a sawi a ni.

NATO Secretary General Mark Rutte-a'n sumdawnna kawnga India hrek a sawi chungchang pawh sawilangin India chuan thil thlen chhoh dan a thlithlai reng a ti a. India mipuiten energy mamawh ang an hmuh chu an ngaihpawimawh ber anih thu a sawi.

<><><>

PM

Prime Minister Narendra Modia chuan vawiin hian Bihar leh West Bengal a tlawh dawn. Bihar ah hian Prime Minister chuan hmasawna hnathawh hrang hrang cheng vaibelchhe sang sarih hu Motihari atangin a hawng dawn a. West Bengal-ah pawh hmasawna hrang hrang cheng vaibelchhe sang nga chuang hu a hawng dawn bawk a ni.

<><><>

IRAQ

Iraq-a Al-Kut khawpuia hypermarket kangah mi 60 chuang an thi. Province governor sawidanin kangmei chhuak hi hyuper market leh chaw dawrah a ni a, kangthelhtuten mi engemawzat an chhanchhuak a. He building leh mall neitute lakah hian thubuai siam anih thu sawiin vanduaina thlen dan an chhui zui nghal a ti